



UNIVERSITÄTS-
BIBLIOTHEK
PADERBORN

Universitätsbibliothek Paderborn

Conciliorvm Omnivm Generalivm Et Provincialivm Collectio Regia

Ab anno CCCCLI. ad annum CCCCLXXV.

Parisiis, 1644

XIX. Sacra Marciani Imperatoris Contra Hæreticos. Imperator Marcianus
Augustus, Palladio præfecto prætorii.

urn:nbn:de:hbz:466:1-14887

fuetudini propter amorem fidei placere cognoscitis; vt eos Constantinopolitanus episcopus lædendi non habeat facultatem. Data xvii. Kal. Maii, Actio & Studio viris clarissimis consulibus.

XIX.

SACRA MARCIANI IMPERATORIS
CONTRA HÆRETICOS.

Imperator Marcianus Augustus, Palladio præfecto prætorii.

LICET iam etiam sacratissima constitutione mansuetudinis meæ cautum ac definitum sit, quæ in eos seueritas exercenda sit, qui Eutychetis vel Apollinaris hæreticam peruersitatem secuti, a religione & fide catholica deuiarunt: Alexandrinæ tamen vrbs ciues atque habitatores tantis sunt Apollinaris infecti venenis, vt necessarium fuerit ea quæ ante sanximus, repetita nunc etiam lege decernere. Oportet enim vt sit numerosa seueritas sanctionum, vbi est licentia crebra culparum. Custodiendæ præterea orthodoxæ fidei cura tanto a serenitate mea adhiberi impensior debet, quanto res humanas diuinæ præcedunt. Quicumque ergo vel in hac sacra vrbe, vel in Alexandrina ciuitate, vel in omni Ægyptiaca dicecesi, diuersisque aliis prouinciis, Eutychetis profanam peruersitatem sequuntur, & ita non credunt, vt trecenti decem & octo sancti patres tradiderunt, catholicam fidem in Nicæna ciuitate fundantes; centum quoque & quinquaginta alii venerabiles episcopi, qui in hac alma vrbe Constantinopolitana postea conuenerunt, & sicut Athanasius & Theophilus & Cyrillus sanctæ recordationis episcopi Alexandrinæ ciuitatis crediderunt, quos etiam Ephesina Synodus (cui beatæ memoriæ Cyrillus præfuit, in qua Nestorii error expulsus est) in vniuersis secuta est, quos & nuper venerabilis Calchedonensis Synodus est secuta, prioribus Conciliis sacerdotum ex omni prorsus parte consentiens, nihilque adimens sacrosancto symbolo, neque adiiciens, sed Eutychetis dogmata funesta condemnans; sciant se esse hæreticos Apollinaristas. Apollinaris enim facinorosissimam sectam Eutyches & Dioscorus mente sacrilega sunt secuti. Ideoque omnes hi qui Apollinaris vel Eutychetis peruersitatem sequuntur,

Supra cap.
xii.

L. Quicum-
que C. de
hæret. & Ma-
nich.

illis pœnis, quæ diuorum retro principum constitutionibus contra Apollinaristas, vel serenitatis nostræ sanctione postmodum contra Eutychianistas, vel hac ipsa augustissima lege contra eosdem decretæ sunt, nouerint se esse plectendos. Idcirco Apollinaristæ, hoc est Eutychianistæ, quibus etsi est in appellatione diuersitas, est tamen in hæresis prauitate coniunctio; & dispar quidem nomen, sed idem sacrilegium; siue in hac alma vrbe, diuersisque prouinciis, siue in Alexandrina ciuitate, seu in Ægyptiaca diœcesi sunt, neque ita credunt, vt prædicti venerabiles patres credebant; neque viro reuerendissimo Alexandrinæ vrbis antistiti Proterio fidem orthodoxam tenenti communicant, secundum sacratissimas diuorum retro principum constitutiones, quæ de Apollinaristis promulgatæ sunt; non habeant potestatem faciendi testamenti & condendæ vltimæ voluntatis, neque id capiant, quod ipsis ex testamento cuiusquam fuerit derelictum, nihil etiam ex donatione aliqua consequantur: sed si quid in ipsos vel liberalitate viuientis, vel morientis fuerit voluntate collatum, id fisco nostro protinus addicatur. Ipsi vero in nullos aliquid ex facultatibus suis donationis titulo & iure transfundant. Episcopos quoque, vel presbyteros, alioque clericos illis creare & habere non liceat, scientibus tam Eutychianistas, vel Apollinaristas, qui ausi fuerint cuiquam episcopi, vel presbyteri, vel clerici nomen imponere, quam hos qui conati fuerint impositum sibi nomen sacerdotale retinere, pœnam exilii & facultatum suarum amissionem subituros. Eos vero qui antehac catholicarum ecclesiarum clerici, vel orthodoxæ fidei monachi fuerunt, & relicto vero & orthodoxo omnipotentis Dei cultu, Apollinaris vel Eutychetis hæresim & dogmata abominanda sectati sunt, vel postea sectabuntur, omnibus pœnis quæ vel hac, vel prioribus legibus aduersus hæreticos constitutæ sunt, iubemus teneri, & extra ipsum quoque Romani imperii solum pelli, sicut de Manichæis præcedentium legum statuta sanxerunt. Vniuersi præterea Apollinaristæ vel Eutychianistæ, non ecclesias, non monasteria sibi construant, parasynaxes & conuenticula tam diurna quam nocturna non contrahant, neque ad domum, neque ad possessionem cuiusquam, ne-

que ad monasterium, neque ad quemcumque alterius locum, operatores sectæ funestissimæ congregentur. Quod si fecerint, & hoc factum fuisse domino volente constiterit, post rem in examine iudicis approbatam, domus vel possessio, in quam conuenerint, fisco sine dilatione societur: monasterium vero, eius ciuitatis orthodoxæ ecclesiæ, in cuius territorio est, iubemus addici. Si vero ignorante domino, sciente vero qui pensiones domus exigit, vel conductore, vel procuratore, vel actore prædii, parasynaxes & conuenticula interdicta collegerint; conductor, vel procurator, siue actor, vel quicumque eos in domum, vel in possessionem, vel monasterium receperint, ac passi fuerint illicitas parasynaxes, conuentusque celebrare; si vilis & abiectæ conditionis sint, fustibus publice & in pœnam suam, & in aliorum coerceantur exemplum: si honestæ vero personæ sint, decem libras auri mulctæ nomine fisco nostro cogantur inferre. Nul- lum præterea Apollinaristam vel Eutychnianam ad aliquam iubemus aspirare militiam, nisi ad cohortaliti- am, vel limitaneam. Si qui vero extra prædictam militiam inuenti fuerint militare, soluto cingulo, honestorum hominum & palatii cõmunionem priuentur: nec in aliqua, quam in ea in qua nati sunt, ciuitate vel vico ac regione versentur. Si qui vero in hac alma vrbe nati sunt, tam sacratissimo comitatu, quam omni per prouincias metropolitana ciuitate pellantur. Nulli insuper Eutychnianæ vel Apollinaristæ, publice vel priuatim aduocandi cœtus, circulos contrahendi, & hæretico more disputandi, ac peruersitatem facinorosi dogmatis asserendi, sit facultas. Nulli etiam contra venerabilem Calchedonensem Synodum liceat aliquid vel dictare, vel scribere, vel edere atque emit- tere, aut aliorum super eadem rescripta proferre: nemo huiusmodi habere libros, & sacrilega scriptorum audeat monumenta seruare. Quod si qui in his criminibus fuerint deprehensi, perpetua deportatione damnentur. Eos vero qui discendi studio audierint de infausta hæresi disputantes, decem librarum auri, quæ fisco nostro inferendæ sunt, iubemus subire dispendiũ. Omnes vero huiuscemodi chartæ ac libri, qui funestum Eutychetis, hoc est Apollinaris, fuerint dogma complexi, incendio concrementur, vt faci-

norosa peruersitatis vestigia ipsa flammis combusta de-
pereant. Æquum namque est, vt immanissima sacrilegia
par poenæ magnitudo percellat, Palladi pater carilli-
me atque amantissime. Illustris igitur & magnifica aucto-
ritas tua, quæ hac sacratissima constitutione decreuimus,
in hac alma vrbe, diuersisque prouinciis, ac præcipue in
Alexandrina ciuitate, & per vniuersam Ægyptiacam dice-
cesim, edictis ex more propositis, ad omnium notitiam fa-
ciat peruenire, vt cuncta, quam statuimus in eos qui rei
fuerint deprehensi, seueritas protinus exerceatur: scienti-
bus moderatoribus prouinciarum, eorumque apparito-
ribus, defensoribus etiam ciuitatum, quod si ea quæ legis
huius religiosissima sanctione custodienda decreuimus,
aut neglexerint, aut aliqua permiserint temeritate violari,
denarum librarum auri multam fisco nostro cogentur
inferre, insuper etiam existimationis suæ periculum susti-
nebunt. Ea quoque, quæ de paganis per omne Romanum
imperium aequaliter valitura perennitatis nostræ lege de-
creuimus, instantissime in eos exerceantur, quos consti-
terit, profanos ritus, ac simulacrorum impios cultus, &
interdicta sibi sacrilegia celebrare. Data sub die Kalenda-
rum Augusti, Constantinopoli, diuo Valentiniano octa-
uum, & Anthemio, viris clarissimis consulibus.

XX.

RESCRIPTVM SYNODICARVM LITERARVM

*Iuuenalis sanctissimi episcopi Hierosolymorum, ad reuerendos
presbyteros & archimandritas, & reliquos monachos Pala-
stinæ prouinciæ sub eius diocesi constitutos.*

Math. 16.

CVM summus & primus apostolorum Petrus dixit:
set: *Tu es Christus filius Dei viui; Dominus intulit,
dicens: Beatus es Simon Bar Iona, quia caro & sanguis non
reuelauit tibi, sed Pater meus qui in caelis est. Et ego dico tibi,
quia tu es Petrus, & super hanc petram ædificabo ecclesiam
meam, & portæ inferi non præualebunt aduersus eam. Super
hanc confessionem roborata est ecclesia Dei, & fidem
quam nobis sancti tradiderunt apostoli, hanc ecclesia
custodiuit, & custodiet vsque ad finem mundi. Quam
& sanctum quoque magnumque & vniuersale Conci-
lium*